

Undang-undang Hukum Islam 1966

Diluluskan

Rang Undang-undang Pertadbiran Hukum Islam 1966 telah diluluskan di dalam Parlimen pada 17 Ogos 1966 dan dengan demikian maka undang-undang itu, apabila dipersetujui oleh kabinet dan *President Republik Singapura* ia akan dikuatkuasakan.

Undang-undang ini berasal dan pernah dikemukakan pada tahun 1960. Apabila rang undang-undang ini disampaikan maka umat Islam membantah dan menuntut supaya disemak semula kerana mereka dapat banyak perkara-perkara yang bertentangan dengan hukum syarak. Majlis membantah itu diketuai oleh almahrum Kiyai Muhammad Fadhlullah Suhaimi, seorang ulama yang terkemuka pada masa itu.

Kerajaan telah mengemukakan semula rang undang-undang itu pada awal tahun 1966 ke Parlimen tatkala disiarkan umat Islam mendapati kandungannya hampir-hampir tidak ada perubahannya daripada rang undang-undang yang dikemukakan pada tahun 1961.

Kerana itu maka banyak badan-badan yang hendak mengkaji rang undang-undang itu. Malangnya rang undang-undang yang bakal mengenai umat Muslimin itu dikemukakan dalam bahasa Inggeris sedang orang-orang yang bakal berkenaan hampir-hampir seumumnya, terutamanya alim ulamanya tidak mengerti bahasa Inggeris dan dengan kerana itu maka terjemahannya dikehendaki.

Apabila memandang yang demikian, kerajaan mengeluarkan terjemahan, di dalam masa rang undang-undang itu sudah terletak di tangan *Select Committee* dan masanya sangat suntuk bagi orang memikirkan

atau menyiasat di dalam terjemahan rang undang-undang itu. Kemudian apabila diselidiki bahawa terjemahan rang undang-undang itu didapati ada kesalahan-kesalahan dan pada setengah-setengah tempat dikatakan mengelirukan. Badan-badan Islam telah mengadakan suatu perjumpaan umum dan mereka memutuskan akan mengkaji rang undang-undang itu dan berhubung dengan masa yang suntuk maka mereka menuntut kerajaan melanjutkan masanya untuk mengkaji rang undang-undang itu kerana di dalam rang undang-undang itu banyak terlibat perkara-perkara yang dipandang bertentangan dengan hukum-hukum Islam. Tetapi malangnya permintaan badan-badan Islam yang bersatu itu tidak dapat diterima dan kerana itu maka perjalanan *Select Committee* diteruskan.

Fikiran-fikiran dan pendapat-pendapat diberikan kepada *Select Committee* dan di dalam masa membuka persidangan *Select Committee* itu, Pengurusnya, Tuan Rajah telah menyatakan bahawa rang undang-undang ini adalah dikehendaki oleh kaum Muslimin.

Sebenarnya kaum Muslimin Singapura berhajat kepada satu undang-undang mengenai mereka. Mereka menghendaki undang-undang itu adalah memberi faedah kepada mereka dan dapat mengawal maslahat mereka serta tidak ada padanya perkara-perkara yang bertentangan dengan hukum syarak.

Apabila rang undang-undang itu dikemukakan, segala pendapat, fikiran dan segala kemahuan umat Islam di seluruh Singapura, terutamanya badan-badan diminta fikirannya. Setengahnya memberi pendapat-pendapatnya kepada Jawatankuasa Pilihan dan ada yang tidak dapat kerana masa yang diberi

terlampau suntuk sedang terjemahannya dibuat di masa yang singkat dan diwahamkan. Daripada fikiran-fikiran yang diberi mereka mendapati ada kononnya di antaranya perkara-perkara yang bertentangan dengan hukum syarak. Kalau demikian keadaannya maka sudah barang tentu rang undang-undang itu mungkin tidak dapat memuaskan hati umat Islam dan kerana itu maka umat Islam pun, apabila sahaja rang undang-undang ini didapati dikemukakan dengan hampir-hampir tidak ada pindaan daripada kehendak dan kemahuan umat Islam, maka badan-badan itu ada yang telah memberi pendapat untuk menolak rang undang-undang itu dan meminta kepada *President Republik Singapura* untuk melakukan kuatkuasanya sebagai Ketua Negara menahan rang undang-undang itu.

Jika sebenarnya timbul perasaan tidak puas hati itu maka kita sangat berdukar-cita mendapati bahawa langkah pihak kerajaan melaksanakan undang-undang Islam dengan tergopoh-gopoh dan tidak disesuaikan dengan kemahuan umat Islam itu. Jika bergopoh-gopoh adalah suatu langkah yang tidak digemari akan memungkinkan timbul perkara-perkara yang menanam benih perasaan-perasaan tidak puas hati umat Islam.

Kerana itu kita memandang bahawa langkah kerajaan meluluskan rang undang-undang itu dengan hampir-hampir tidak ada pindaan padahal dari semenjak tahun 1961 lagi umat Islam menghendaki pindaan yang luas. Adakah kehendak umat Islam tidak diraikan? Soal ini tentu timbul. Bertambah pula ada bantahan-bantahan dari golongan: (1) dari PAS, (2) dari pertubuhan-pertubuhan